



Peqqissutsimut Naalakkersuisoqarfik

---

**Kalaallit Peqqissartut Najugaqarfianni kalaaliminernik  
qanoq atuinertulertoqarsinnaanernik kiisalu igaat  
qanoq najugartunut  
kalaaliminersunninerulersinneqarsinnaanernik  
misissuineq**

- Inatsisartunut agguaassassat FM2020



## **Tunggavigisaq**

2019-imi Inatsisartut Upernaakkut ataatsimiinneranni oqaluuserisassap 122-p oqaluuseri-neqarnerani aalajangerneqarpoq, misissorneqassasoq qanoq Kalaallit Peqqissartut Najugaqarfianni kalaaliminernik atuinerulertoqarsinnaasoq kiisalu najugaqartut nerisaqarnik-kut misigisaannik pitsaanerulersitsisoqarsinnaasoq. Taamaattumik Naalakkersuisut tamatumingga misissuisitsisimapput, misissuinerlu UPA2020-mi saqqummiunneqarnis-saminut maanna piareerpoq.

## **Aallaqqaasiut**

Kalaaliminernik atuneq kiisalu nerisassat mamaqarnerat peqqissartunit ilaquataasunillu maluginiarneqartorujussuusimavoq. Taamaattumik misissuisitsineq aallarnerneqarpoq. Misissuinerup saniatigut suliniutinik nutaanik aallarnisoqartarpoq, Kalaallit Peqqissartut Najugaqarfianni najugaqartut nerisaqarnikkut misigisaannik pitsaanerulersitsisussanik. Maanna allaaserineqassaaq qanoq Peqqissartut Najugaqarfianni kalaaliminernik atuinerulertoqarsimasooq kiisalu qanoq nerisassat najugaqartunut illinnarnerulersinniarnegarsimasut nerinermilu pissutsit pitsanngorsarniarneqarlutik. Tamatumani saniatigut Peqqissartut Najugaqarfianni nerisaqarnerup tungaatigut siunissami iliuuserisassat nassuiarneqassapput.

Misissuineq Peqqissartullu Najugaqarfianni sulineq aningaasaqarnikkut peqqissutsimillu suliaqarnikkut killiliussat atuuttut iluanni pitsangorsaarnernik aallaaveqarpoq. Tassa imaappoq nerisaqartitsinerumut tunngatillugu Peqqissartut Najugaqarfiannut aningaasatigut killiliussaareersut naatsorsuutigineqareerput. Danmarkimi suliffeqarfittut allatulli Peqqissartut Najugaqarfiat eqqiluisaarnissaq pillugu inatsisitigut piumasaqaatinik malitas-saqarpoq, taamatuttaaq naatsorsuutigineqassaaq ulluinnarni nerisaqarneq peqqissartut ilaannut tunngatillugu katsorsaanerup peqqissaanerullu ilarujussuanut ilaasoq.

## **Qitiutillugit sammineqartussat**

Misissuinerumi arlallit qitiutillugit sammineqarlutillu suliniutigineqassapput, taakkulu aallar-tinneqarlutillu nalilersorneqarput. Misissuinerumi sammisat pingaernerit sisamaapput.

- Najugaqartunik peqataatitsineruneg
- Kalaaliminernik pisortatigoortuunngitsumik tunissuteqartarnerit
- Igaffiup najugaqartullu suleqatigiinnerannik attaveqatigiinnerannillu pitsanngorsaaneq
- Igaffimmi sulisunik pikkorissaaneq

## **Najugaqartunik peqataatitsineruneg**

Peqqissartut ilaquataasalu Peqqissartut Najugaqarfianniittut peqataatinneqarnissaat anertuumik pingaartinneqartarpoq, misissuinermilu matumani aamma taamaappoq. Nerisaqarneq nerisarnernu najugaqartunik ataatsimiititsinerni assut eqqartorneqartarput, taamaattumillu ajornartorsiutit aaqqiussutissallu aamma eqqartorneqartarlutik. Najugaqar-tut kissaateqarnerat tunngavigalugu nillartaatitsivimmik isersimaartarfimmut ilisisoqarpoq, tassanngaanniillu imeruusaatit proteinitallit tiguinnarneqarsinnaapput. Naatsorsuutigine-qarpoq taamatut tigusiinnarsinnaalerneg nerrikittunut, ullormut arlaleriarlutik inuussutissa-qarluartunik nerisarnissaminnik pisariartitsisunut, immikkut pingaaruteqassasoq.

Najugaqartut kissaatigaattaaq nerisassanik amerlanernik qinigassaqartassasoq, ilaatigut manninnik ullut tamaasa sassaalliteqartarnissaq pingaartinneqartorujussuulluni. Taamaattumik nerinerni tamani nerisassanik amerlanernik qinigassaqarnissaq sulissutigineqarsimavoq, taamatuttaaq nerisassanik saqqummeeriaaseq pitsanngorsarneqarsimavoq. Tamatumunnga atatillugu nerisassanik assigiinngitsunik sassaalliteqarnermi sullissineq aamma allanngortinneqarpoq, najugaqartummi maanna namminneertarput taamaalillutillu nerisassaminnik namminneq niusisinnaalerlutik. Tamanna eqqiluisaarnissaq pillugu inatsisinut akerliunngilaq, igaffimmimi sulisut saaffigineqariaannaasarput, soorlu nerinermi atortunik allanik assingusunilluunniit pisariaqartitsinermi.

Najugaqartut qanoq akulikitsigisumik kalaaliminertorusuttarnerat najugaqartunik ataatsimiititsinerni aamma paasiniarneqarpoq. Ilimagineqartut assigiinngitsunik kissaateqartoqarpoq, sap. akunneranut 1-7-eriarluni kalaaliminertortarnissaq kissaatigineqarluni. Tamatumunngattaaq atatillugu ersersinneqarpoq najugaqartut nerisassat mamarisaat qanorlu iganeqarnissaat pillugu isumaat assigiinngitsorujussuusut, taamaattumik najugaqartut pisariaqartitaat tamaasa ataatsikkut malikkuminaassinnaarpassipput.

### **Tunissuteqarnerit**

Naluneqanngitsutut kalaaliminernik Danmarkimut eqqussinermi allaffissornikkut peqqis-sutsikkullu arlalitsigut misissuisoqartarpoq aamma akuersissutinik piniartoqartarpoq. Tassa imaappoq maannakkut Peqqissartut Najugaqarfiata Brugseni aamma Neqi A/S kisiisa Kalaallit Nunaanniit neqinik pilersuisutut atorsinnaavai. Tamatuma saniatigut Peqqissartut Najugaqarfiat Kalaallit Nunaanni nerisassalerinermik suliaqatartunit arlalinnit 2019-ip ingerlanerani tunissuteqarfigineqarpoq, ilaatigut Neqi A/S-imiit, Royal Greenland-imiit aamma Polar Seafood-imiit. Polar Seafood aalajangersimasumik tunissuteqartar-nissamik isumaqatigiissuteqarfigineqarpoq. Polar Seafood aalisakkanik, raajanik assa-giarsunillu nunatsinneersunik Peqqissartut Najugaqarfiata igaffianut akuttunngitsumik tunissuteqartarpoq. Oqaatigineqassaaq puisip neqaanik 2019-imi pissarsisoqarsinnaa-simanngitsoq, puisip neqaami amerlanertigut kalaalimineerniarfinni tuniniarneqartarmat, neqi pisariaqartumik nakkutigineqartarani. Taamaattumik Peqqissartut Najugaqarfiata pu-isip neqaanik tiguseqqusaanngilaq.

Aamma inuinnaat nerisassanik, uumasup nakorsaanit misissorneqarsimanngitsunik, tunissuteqarusuttarput. Inatsisit pissutigalugit Peqqissartut Najugaqarfianni igaffiup tunissutit taakku tigusinnaasanngilai, kisianni Peqqissartut Najugaqarfiata tuniserusuttut taakku ikiorlugit najugaqartunut attaveqartittarpai. Taamaalilluni kalaalimerngit inuinarnut, tassa najugaqartunut, nassiuinneqartarput, taakkulu namminneq kalaalimerngit akunnerminni agguaattarpaat. Najugaqartut kalaaliminernik qerititsivimmiititaqarsinnaapput. Taamaaliornikkut najugaqartut namminneq mamarisaminnik najugaqartut igaffiini igasinnaasarput.

### **Peqqissartut Najugaqarfiata igaffia**

Nerisassiornerup pitsaasuunissaa qulakkeerniarlugu kiisalu nerrikittunut nerisassat immikkut ittut peqqissartullu allat nerisaqarnikkut immikkut pisariaqartitaqartut sulilluarneqarnissaat qulakkeerniarlugu Peqqissartut Najugaqarfiata igaffiani sulisut tamar-mik igaffeqarnerup kantiinaqarnerullu iluani ilinniarsimasuupput.

Nerisassat sassaallitigineqartussat Peqqissartut Najugaqarfiata igaffiani iganeqartartut ineqartut isumasioqatigalugit nerisassiarineqartarput. Nerisaqarneq pillugu qaammatik-kuutaartumik ataatsimiittoqartalernikuvoq, tassanilu najugaqartut nerisassanik pilersaa-rusiamut tunngatillugu kissaateqarsinnaallutillu isummersuisinnaapput. Kalaaliminernik

ti-gusaqarnermi igaffimmi sulisut najugaqartunut akuttunngitsumik saaffiginnillutik kalaalimerngit qanoq suliarineqarnissaannik nerisassiarineqarnissaannillu siunnersortit-tarput. Tamanna igaffimmi sulisut najugaqartullu suleqatigiinnerannut attaveqatigiinne-rannullu pitsanngorsaataasimavoq. Igaffimmi ikiortit marluk kalaallisut oqaasillit atorfinitsinneqarmata attaveqatigiilluarneq tamanna suli pitsanngoriarpoq.

### **Suliap ingerlaqqinnissaa**

Najugaqartunik peqataatitsineq aamma nerisassat nerisarnerlu pillugit oqaloqatigiinne-rulerneq Peqqissartut Najugaqarfianni nerisarnernut kalaaliminernillu atuinermut atatillugu allannguutininik arlalinnik nassataqareerpoq, najugaqartut kissaateqarnerat malillugu. Kalaaliminernik nerisaqarnerup kalaaliminertortarnerullu Peqqissartut Najuga-qarfianni najugaqarnermut Danmarkimilu katsorsartinnermut pingaaruteqarnera anner-tuumik isiginiarneqartuassaaq. Kalaaliminernik amerlanerusunik pisarnissaq suli sulissu-tigineqarpoq, maluginiaqquneqarporli Peqqissartut Najugaqarfiat inatsisitigut maligassa-qartitaasoq, tamatumalu kingunerisaanik kalaaliminernik Danmarkimut eqqussisarneq suli killilersorneqartoq.

Peqqissartut Najugaqarfiat Danmarkimi katsorsartittut utaqqiisaasumik najugaqarfigigaat suli isiginiarneqassaaq. Taamaattumik Peqqissartut Najugaqarfiat najugaqartunut igaffe-qarpoq, peqqissartut kalaaliminiutiminnik namminneq igasinnaaniassammata, soorlulu-sooq angerlarsimallutik illoqarfimminnilu peqqissaavimmi katsorsartillutik.

Attaveqatigiinnermik najugaqartunillu peqataatitsinermik qitiutitsinerulerneq siunissami ingerlaannassaaq, nalilerneqarpormi tamanna Peqqissartut Najugaqarfianni najugaqar-tunut nerisaqarnerup tungaatigut pitsaasumik sunniuteqalereertoq. Tamatuma saniatigut inuinnarnut Kalaallillu Nunaanni suliffeqarfinnut attaveqarluarlernissap sulissutigineqar-nera ingerlatiinnarneqassaaq, taamaalilluni Peqqissartut Najugaqarfiat kalaaliminernik tunissutinik siunissamittaaq tigusaqartarniassamat. Tamatumunnga ilutigitillugu Inuili attaveqarfigineqartalerpoq, igaffimmi sulisut pikkorissarneqarnissaat siunertarineqarluni. Tamanna najugaqartut mamarisaminnik nerisaqartarnissaannut suli iluaqutaanerussaaq. Peqqissartut Najugaqarfiata maannakkut misissorpaa qanoq Inuili aqutigalugu pikkoris-sartoqarsinnaasoq.